

MISA CON NENOS

31 de decembro 2017 - Sagrada Familia

Evanxeo Lucas 2, 22-40: *“O neno ía crescendo, cheo de sabedoría.*

Mensaxe: **Nace Xesús nunha FAMILIA. QUERE E COIDA a túa!**



**Nace Xesús nunha
FAMILIA.
QUERE e COIDA a túa!**

1. ACOLLIDA

Irmáns e irmás:

Con toda a alegría do Nadal reunímonos neste domingo para celebrar á Sagrada Familia. Deus fíxose un dos nosos, veu compartir a nosa vida. Xesús, sendo neno, creceu, robusteceu e encheuse de sabedoría no seu pobo, aprendendo na súa casa, cos seus pais, a amar e a rezar a Deus. Na casa aprendemos aquelas cousas fundamentais que marcan o resto da vida, especialmente cando unha casa está chea de Deus, como a de Xesús en Nazaré. Recemos hoxe pola nosa familia e por todas as familias do mundo, coas súas alegrías, temores e esperanzas, para que as Deus bendiga a todas.



Saúdo: *Que a paz, o amor e a graza de Deus manifestados en Cristo, nado para a nosa salvación, estea convosco.*

(Pódese acompañar ao sacerdote cunha Icona da Sagrada Familia; no altar pódese colocar unha casiña do portal coas tres figuriñas: Xesús, María e Xosé. Non estaría mal que algunha familia ou varias realizasen as peticións ou as ofrendas, etc).

2. PERDÓN

(Sacerdote) Recoñezamos os nosos pecados.

- **(Posible... pai-nai)** Fillo de Deus, que nacido de María, fixécheste o noso irmán. **Señor, ten piedade de nós.**
- **(Posible... catequista)** Fillo de María, que coñeces e comprendes a nosa debilidade. **Cristo, ten piedade de nós.**
- **(Posible... neno-nena)** Fillo primoxénito do Pai, que fas de todos nós unha soa familia. **Señor, ten piedade de nós.**

(Sacerdote) Que Deus, noso Pai, teña misericordia de nós, perdoe os nosos pecados e nos leve á vida eterna.

4. PALABRA DE DEUS

ECLESIAÍSTICO 3, 2-6.12-14: *Honra a teus pais.*

O Señor honra máis o pai que os fillos e afirma o dereito da nai sobre eles. **Quen honra a seu pai expía os seus pecados, e quen respecta a súa nai é como quen acumula tesouros.** Quen honra o seu pai alegrárase dos seus fillos e **cando rece, será escoitado.** Quen respecta o seu pai terá longa vida, e quen honra a súa nai obedece ao Señor. **Fillo, coida do teu pai na súa vellez** e durante a súa vida non lle causes tristeza. Aínda que perda e xuízo, **sé indulxente con el** e non o despreces aínda estando ti en peno vigor. Porque a **compaixón cara ao pai** non será esquecida e servirache para reparar os teus pecados. *Palabra do Señor.*

- **SAL. 127:** *Ditosos os que temen o Señor e seguen os seus camiños.*

COLOSENSES 3, 12-21: *A vida de familia vivida no Señor.*

Irmáns: Como elixidos de Deus, santos e amados, **revestídevos de compaixón entrañable, bondade, humildade, mansedume e paciencia.** Soportádevos mutuamente e **perdoádevos** cando algún teña queixas contra outro. O Señor perdoouvos: facede vós o mesmo. E por encima de todo isto, o **amor**, que é o vínculo da unidade perfecta. **Que a paz de Cristo reine** no voso corazón; a ela fostes convocados, nun só corpo. **Sede tamén agradecidos.** A palabra de Cristo habite entre vós en toda a súa riqueza; ensinádevos uns a outros con toda sabedoría; exhortádevos mutuamente. **Cantade a Deus, dádelle grazas de corazón**, con salmos, himnos e cánticos inspirados. E, todo o que de palabra ou de obra realicedes, sexa todo en nome de Xesús, dando grazas a Deus Pai por medio del. *Palabra do Señor.*

SAN LUCAS 2, 22.39-40: *O neno ía crescendo cheo de sabedoría*

Narrador: Cando se cumpriron os días da purificación, segundo a lei de Moisés, os pais de Xesús levárono a Xerusalén para presentalo ao Señor. E, cando cumpriron todo o que prescribía a lei do Señor, Xesús e os seus pais volveron a Galilea, á súa cidade de Nazaré. O neno, pola súa parte, ía **crecendo e robustecéndose, cheo de sabedoría; e a graza de Deus** estaba con el. *Palabra do Señor.*

2. ORACIÓN DA COMUNIDADE

- *(Sacerdote)* Damos grazas a Deus polas nosas familias e pedimos por todas, especialmente polas máis necesitadas, dicindo: **-Pedímoscho, Pai.**



1. Para que a familia sexa comunidade permanente de vida e amor. **Oremos.**
2. Para que nas nosas familias nos amemos cada día máis superando as dificultades. **Oremos.**
3. Para que nas nosas familias poñamos amor e alegría ao noso redor e abrámonos aos que nos necesiten. **Oremos.**
4. Para que as familias en crise, sen traballo ou que viven con tensións, atopen axuda e fortaleza para saír adiante. **Oremos.**
5. Para que eduquemos na fe aos nosos fillos orando e participando xuntos na eucaristía. **Oremos**
6. Para que saibamos valorar a presenza dos avós en casa, vexamos neles a fonte da sabedoría, o tronco onde naceu o que somos e temos. **Oremos.**
7. Para que fagamos das nosas familias fogares, pequenas igrexas, santuarios de vida e de amor. **Oremos.**

(Sacerdote) Oremos: Pai, envolve no teu amor a este mundo e bendí a todas as familias.

3. PRESENTACIÓN DE OFRENDAS: para nenos

- **CUERDA CON NUDOS O UNA PIÑA:** Con esta corda repleta de nós (con esta piña), queremos simbolizar a forza e o segredo da familia: o amor fai posible a unión entre todos.
- **ICONA DE SDA. FAMILIA:** Con esta icona da Sagrada. Familia, queremos traer ante o altar, a gratitude de todas as familias da nosa parroquia por ter escollido Deus unha familia para vir ao mundo.
- **PAN E VIÑO:** Co cáliz repleto de viño e a patena desbordante de pan, levamos ata o altar as fatigas, os traballos, os éxitos, os estudos, a responsabilidade, as dificultades e o amor de todas as nosas familias.



PRESENTACIONES DE OFRENDAS (familiares)

- ESPOSO:** Neste día en que miramos a Xesús coa súa familia, queremos presentar estas ofrendas, levadas por uns avós, uns pais e uns nenos, en representación das nosas familias.
- ESPOSA:** Ofrecémosche estas **alianzas**, signo do compromiso de comunión, fidelidade e entrega da nosa vida matrimonial.
- ESPOSO:** Tamén traemos ao teu altar un cadro da **Sagrada Familia** como expresión do noso desexo de facer dos nosos fogares pequenas igrexas domésticas onde se vivan os valores da Familia de Nazaré.
- ESPOSA:** E presentámosche o **viño e o pan**, froitos da terra e do traballo dos homes, que serán para nós pan de Vida e bebida de Salvación, para poñer sobre o altar a vida das nosas familias.





Oración da familia (A.L. 325)

Xesús, María e Xosé en vós contemplamos o esplendor do verdadeiro amor, a vós, confiados, dirixímonos.

Santa Familia de Nazaré, fai tamén das nosas familias lugar de comunión e cenáculo de oración, auténticas escolas do Evanxeo e pequenas Igrexas domésticas.

Santa Familia de Nazaré, que nunca máis haxa nas familias episodios de violencia, de cerrazón e división; que quen sexa ferido ou escandalizado sexa axiña consolado e curado.

Santa Familia de Nazaré, que todos tomemos conciencia do carácter sagrado e inviolable da familia, da súa beleza no proxecto de Deus.

Xesús, María e Xosé, escoitade e acollede a nosa súplica.

Amén.



30 de diciembre

Día de la
SAGRADA FAMILIA

31 DECEMBRO 2017
REDE CATEQUESE GALICIA